





大明會典卷之一百三十五

兵部十八

大閱

古者大閱以講武事。蓋安不忘危之意。  
國初



車駕親征。則隨地閱武。宣德正統間。或閱於近郊。於西苑。然不著令。隆慶三年。因輔臣建議。於三大營教場舉行。萬曆九年

上親大閱。一如隆慶中故事。今具列焉。

隆慶二年。題准營兵驕惰。宜設法訓練。自隆慶三年為始。於冬季農隙之候。恭請



聖駕親臨閱視甄別將官考校軍士以為黜陟賞罰  
○又題准

聖駕閱武之日。三大營官軍俱先期在營拱候。內選  
有馬戰兵二千名。委官四員分領。前導後隨。候  
入教場。仍以次各入營伍。其守門擺隊官軍。於  
城守備兵巡捕。并錦衣衛鎮撫司軍撥用。仍先  
請

命文武大臣總理提督各該守門內外官軍。每門添  
差京堂一員。錦衣衛千百戶一員。廢棄將官一  
員。監守。至日。三大營馬步官軍除城守圍宿外。

其餘戰兵十枝。車兵十枝。照常演陣畢。請

旨閱射。公侯駙馬伯。錦衣衛官。及副參遊佐坐營號  
頭中軍千總等官。俱於

御前較閱馬步箭。馬上人各三箭。步下人各六箭。其  
鎗刀火器各量取一隊試驗。其把總以下。及家  
丁軍人射箭等項。令府部大臣四員。於神樞神  
機各廳分投校閱。差御史四員。兵部司官四員。  
公同監箭。次日各官將校閱過等第具奏。○又  
題准閱視以箭數分賞罰。職官一等內。有馬中  
三箭。步中六箭者。先賞十兩銀牌一面。紵絲二



疋。折銀五兩。若平昔無過。曾經薦揚者。仍附記在簿。特加超擢。馬中三箭。步中四箭。五箭者。先賞五兩銀牌一面。色段二疋。折銀三兩。若平昔無過者。亦附記錄用。若平昔官箴有玷。謀勇無取。止是厚賞。如係公侯伯。在超擢錄用之例。除賞賚外。遇有兩京坐府員缺。依次擢用。若止是馬步二箭。至三箭者。賞三兩銀牌一面。色紗一疋。折銀一兩。馬中二箭。步中一箭者。賞一兩五錢銀牌一面。或馬中而步不中。或步中而馬不中者。姑准策勵供職。若馬箭不中。而步下中三箭以上者。量賞一兩銀牌一面。馬步俱不中者。係公侯伯。罰住祿米三箇月。係錦衣衛。并各衛願射官。各罰俸三箇月。係營中將領。罰俸半年。若平昔有過者。係京衛革任隨營操備。係外衛革任回衛差操。其軍士中。有能馬中三箭。步中六箭者。賞銀一兩。紅布三疋。折銀一兩。馬中三箭。步中五箭。四箭者。賞銀一兩。紅布一疋。折銀三錢。馬步俱中二箭。至三箭者。賞銀一兩。馬中二箭。三箭。步中一箭者。賞銀四錢。或馬中而步不中。或步中而馬不中者。姑免責治。若馬箭



不中。而步下中三四箭以上者。仍賞銀四錢。馬步俱不中者。照例決打。若係教師家丁。仍革支月糧一石。舞刀鎗鈎鑣。上等賞銀三錢。紅布一疋。折銀三錢。次等賞銀二錢。三等免其責治。四等照例決打。次日。總協戎政官率將佐等官各具朝服。上表謝。

恩。文武百官。具朝服侍班。行稱賀禮。次日。

上御皇極門。賜勅。總督戎政捧至綵輿。將士導引至教場開讀。即日賞賚將士。并戒罰有差。

### 武舉

武舉之法。試其謀畧藝能。列其等第而推用之。累朝選試陞用。法各不同。具列於後。

天順八年。令天下文武衙門。各詢訪所屬官員軍民人等有通曉兵法。謀勇出衆者。從公保舉。從巡撫巡按會同三司官考試。直隸從巡按御史考試。中者。禮送兵部。會同總兵官。於帥府內試策畧。教場內試弓馬。答策二問。騎中四矢。步中二矢以上者。為中式。官量加署職二級。旗舍餘丁。授所鎮撫民。授各衛試經歷。俱月支米三石。若答策二問。騎中二矢。步中一矢以上者。次



之。官量加署職一級。旗舍餘丁。授冠帶總旗。民授各衛試知事。俱月支米二石。並送京營量用把總管隊聽調。有功照例陞賞。○弘治六年定武舉試策二道。文理優韜畧熟。及射中式者。陞二級。文不甚優。射雖偶中。止陞一級。雖善行文。射不中式。及射雖合式。策不佳者。俱暫黜。以候再試。中者。送團營。或分送各邊。俱贖畫。或把總。或守備城堡。免令管隊。後每六年九月一次考試。軍衛有司。果有才堪應舉者。聽於應試之期。禮送赴部。考退生員。并曾經問斷。行止有虧者。不許。凡再試不中者。發回原籍。供本等職役。後又令先策畧。後弓馬。如策不佳。即不許騎射。或答策雖佳。不能騎射者。亦黜。後又令中式舉人。添支月米。遇陞用之日。即與住支。○十七年奏准。武舉三年一次舉行。一日答策。次日射箭。考試策畧弓馬俱畢。中式者。照例擬陞。仍將中試姓名。做文舉事例。出榜賜宴。俱送團營聽用。願回原籍者。許撫按官推選軍政。○正德三年奏准。武舉開科之年。預行兩京。并十三省各衙門。曉諭各色人等。如有究極韜畧。精通武藝。身家



無礙者。許各赴所在官司投報。俱從撫按官。公同三司官考試。起送赴部。○嘉靖元年議准。武舉官生。兩京武學於兵部月考優等選取。在外聽巡按御史考試選取。每遇開科之期。兵部堂上官。并提督京營總兵官。統領大綱。兵部屬官。分理衆務。初場較騎射。二場較步射。俱於京營將臺前。三場試策。二道論一道。於文場內。先期請

命翰林官二員。為考試官。給事中。并部屬官四員。為同考試官。監察御史二員。為監試官。其答策有能洞識韜畧。作論有能精通義理。參以弓馬俱優者。中式。其策論雖優。而弓馬不及。或弓馬偏長。而策論不通。俱發回。候開科再考。中式官生。照文舉事例。梓名賜宴。仍俱陞署職二級。月支米三石。指揮以上。斟酌推用。署千戶。百戶。鎮撫總旗。俱送各邊總兵等官處。贊畫及守堡。聽調殺賊。應得俸糧。并加添米石。俱於原衛所支給。獲有軍功。照例加陞。五年無功者。發回。○六年題准。各邊總兵將。贊畫武舉人員。量材發定衛所。照依在邊各官。隨營供職。撫按官不時查考。



如有掛名不到。及攘買功次等弊。指實參奏。○八年題准。取中武舉官生。各照陞授職事。俱月支米三石。內有應襲舍人。候襲替之日。照例加陞。通送團營將臺下寄操。指揮於本衛。都指揮在京者。於本衛。在外者。於本都司。各帶俸。俱候推用。千戶以下。照例分送各邊。聽撫按衙門委用。應得俸糧。并加添米石。俱於原衛所。并今駐衛所支給。指揮等官。一時推用未及。若有願回原籍者。咨送撫按官處。照依品秩委用。千戶以下。除能立軍功陞級外。其間果有才能出衆。曾於所在地方贊謀効力者。不拘有無軍功。聽撫按官指實薦舉。五年滿日。兵部酌量奏請。千戶量加署指揮職銜。百戶以下。量加署千戶職銜。令把總備邊守口。掌印。僉書。若能建立奇功。一體超用。其贊畫官員五年滿日。兵部審驗才力有用。再發各邊贊畫五年。通前十年之上。再無軍功。又無薦舉。兵部再驗其才。委無可取。及年老殘疾。即將所加米石停止。其武舉所加署職。非有軍功。雖遇

恩例。不得實授。加添月米。日後陞職。所得俸米過於



所加三石之數。即將所加米石住支。止支本等俸給。前項官員。若有犯該革任帶俸閒住者。不論官職崇卑。但係武舉。加陞俸米。俱行停革。永不推用。應襲舍人。照例施行。○十四年議准。武舉千戶以下。不願贖畫者。查原籍原衛。如係邊方。兵部即咨各該撫鎮等官。酌量差委推用。其腹裏地方。行撫按衙門。兩京地方。悉聽兵部。及行南京兵部。各量材委用。以後雖無軍功。但積有年勞。累經薦舉者。與指揮以上。一體推用。若十年以上。未著賢勞。亦無薦舉。及審年力。雖有

不堪。原非犯該革任帶俸閒住人員。各該衛所開報前來。其原加米石。臨時議處。○十七年。令武舉定於秋行。以後開科。俱於九月行事。○二十二年。議准。武舉開設。務求真才。取人不必拘定名數。仍照會試南北卷事例。分別邊方腹裏。以薊鎮。昌平。遼東。萬全。宣府。大同。山西。陝西。延綏。甘肅。寧夏。雲南。貴州。為邊方。以兩京。京衛。南直隸。浙江。江西。福建。山東。河南。湖廣。廣東。廣西。四川。河間。順德。大名。廣平。真定。保定。為腹裏。如每科五十名。邊方取三十名。腹裏取二十名。○



二十六年題准。武舉中式人員。其在腹裏。若有  
才堪邊用。願立邊功者。起送兵部。再行考驗。革  
去贅畫名色。分送九邊總兵叅將。委領管軍殺  
賊。○三十二年議准。三次鄉試中式武舉官生。  
查照文舉會試事例。免其再試。徑許赴京會試。  
○隆慶二年議准。武舉中式者。分邊腹二項。以  
後邊方有缺。即先推邊方第一人。腹裏有缺。即  
先推腹裏第一人。各挨次推用。一如文舉挨次  
法。○四年議准。凡天下軍民人等。力勝五百斤  
或四百斤。三百斤以上。及武藝超衆者。府州縣

呈送撫按。嚴加考校。如果藝勇不凡。量給衣巾。  
充為武生。開科年分。除精通論策者。聽隨武舉  
入場。其餘候場事畢日。撫按復行驗中。行該府  
給文到部。會試之年。照例於武舉場畢。將各送  
到選中之人。公同監試。御史通行考驗。不中者  
發回肄業。中者為首一人。量給冠帶。隨宜委用。  
餘俱分發薊鎮。其力舉五百斤者。留京為教師。  
食糧練軍。三年有成效。量陞職級。○萬曆二年  
議准。錦衣衛及各衛武舉千百戶等官。年深未  
經咨送效用者。俱送京營委用。限以三年。再無



金鑑卷百五十五  
九  
薦舉。即將武舉米石。照例住支。係世官者。止支本等俸糧。係旗軍舍餘。即令閒住。○五年。令御史監試武舉。嚴加巡察。有違犯者。照文舉例行。

### 舉用將材

凡武官奉

旨陞任者。或一級。或二級。即遵

旨照級授官。屬武選司掌行。若謀勇出衆。累經薦舉者。難拘資格。即不次超遷。或曰量陞。曰署。曰以某官行事。曰奉

欽依。皆屬職方司。故有舉用將材之例。

宣德五年。令天下都司衛所。於所屬官。及行伍內。每歲選智勇廉能者一人。送京試用。○成化八年。令文武官員軍民人等。有諳曉兵法。謀勇過人。弓馬熟閒者。並許保舉。試中者。無官授以冠帶。有官仍舊職。撥團營操練。聽調。邊方舉者。就各邊操備。其有才兼文武。堪為大將。耻於自進者。府部都察院。通政司。大理寺。科道。并在外衙門。各舉所知。○嘉靖六年。令於各邊空閒都督。都指揮。及副參遊擊等官內。舉保曾經戰陣。謀勇可觀者。行取聽用。○七年。奏准。兩京堂上。



官并科道及在外方面官員如有指揮以上等官曾經領兵效勞者不拘見任閒住從公舉保  
○二十一年議准將官犯罪除犯有賊私永不敘用外若是地方失事重者擬死其次充軍其次為民其次革職閒住其次於實職上降級其次於流官上降級如總兵降副總兵副總兵降參將守備果有後效仍以次陞用此外如有謀勇異等沈淪行伍者許各該總督撫按官一體薦舉試驗果實破格收用○二十二年議准腹裏官軍曾經薦舉有願赴邊方立功者本處巡撫官咨送軍門試用○二十八年題准行六科十三道及巡視京營科道總督巡撫巡關等官博訪不拘軍民職官山林草野武舉會舉見任革任及有過廢棄人員但有諳曉韜畧熟閒弓馬膂力過人謀猷出衆者不拘名數各舉所知開列上陳以次酌用○隆慶二年

詔各邊將領等官有素著謀勇累立戰功偶因失事革職閒住及充軍等項年力未衰猶堪任使者撫按科道官查訪疏名奏請定奪○萬曆元年議准在京四品以上及科道官在外總督鎮



巡等官各延訪。不拘見任。隱逸。及被論聽勘。革  
棄等項人員。上自總兵。下至卒伍。民庶。某可為  
大將。某可為偏裨。某可備先鋒。及遠使外夷。據  
實開註。每人或舉一二員名。或三五員名具奏。  
兵部再加品階。並將舉主職名。題覆附簿。聽備  
緩急推用。如樹有功績。賞及舉主。或徇私濫舉。  
以致債事。舉主一體議罰。○十三年。令各處武  
職。有勇畧出衆。廉潔愛士者。各督撫官加意詢  
訪。不時咨部。備查奏保。酌量推用。先儘指揮。次  
及千百戶。鎮撫。以及近科武舉。



大明會典卷之一百三十六

兵部十九

**巡捕**

國初捕盜在外無專官。惟在京設五城兵馬指揮司。以巡邏京城內外地方為職。其後在京添用錦衣衛官校。成化末。加撥營軍。弘治以來。在外添設捕盜通判。州判。主簿等官。而諸法禁亦漸詳密。今備列于後。

在京

巡捕官

提督官一員



中軍官一員

左右參將二員

地方把總一十二員

城內東邊二員

西邊二員

城外東北二員

西北二員

東南二員

西南二員

尖哨把總官六員

左右掖二員

左右哨二員

前後哨二員

額定官軍一萬一十八員名。馬五千六百四十一匹。今見在三千四百六十四

凡京城巡捕。正統八年題准。南城兵馬委官督同火甲。於南海子外巡捕。○成化四年。以京城內外多盜。令錦衣衛指揮一員。同巡城御史專一提督五城兵馬。并巡捕官校挨拏。○二十一年。奏准團營摘撥精壯馬隊官軍二百員名。隨



同官校併力拏賊○弘治元年令三千營選委指揮千百戶四員各管領精壯馬軍三十名於京城外高密店義井兒良鄉清河四處地方駐劄隄備盜賊一年更替○又令錦衣衛委官十五員并旗手等十五衛委官各一員選帶旗軍各二十名分定地方相兼緝捕巡警○二年添撥鄭村壩巡捕有馬官軍三十名○又題准巡捕官軍各給團牌以便夜巡○三年令上直衛分共十五衛各撥官軍二十一員名分派五城空閒寺觀十五處駐劄捕盜○七年奏准於團

營摘撥官軍三十名委官一員管領於弘仁橋巡捕○十五年奏設巡捕把總都指揮一員提督高密店等七處地方每處仍委千百戶各一員以半年更替○十八年奏准團營提督官於十二營內每季輪撥馬軍一百二十名選委千百戶各一員管領於

長安東西二門天師菴草廠大慈恩寺等處巡邏聽兵部主事并巡城御史點閘○正德三年添設巡捕把總指揮一員與原設把總分管京城外地方一員管東北一員管西南一年更替○



七年。令京城巡捕把總指揮二員。一月更替。○十年議准。京城內外巡捕官軍。城內東西二路。把總官二員。委官八員。各分管地方。每委官一員。馬軍四十九名。步軍五十名。共軍七百九十二名。馬四百匹。城外東北西南二路。把總官二員。每員領有馬官軍五十員名。照舊海巡。分管官七員。每員馬軍一百六十名。共軍一千一百二十名。馬一千一百二十四匹。○十六年奏准。添撥團營有馬軍二千員名。責付原委四路把總指揮。相兼原領官軍。於該管地方巡邏緝捕。仍推都指揮一員。充叅將。請

勅提督。巡城御史。同兵部委官。不時點閘。○嘉靖元年題准。添設城外巡捕把總指揮一員。及添撥官軍一千員名。城內分東邊西邊。城外分西南東南東北。共把總指揮五員。官軍五千餘名。南至海子。北至居庸關。西至蘆溝橋。東至通州。分授巡捕。又於內揀選精銳五百員名。立為尖哨。加給行糧。每名月大。米四斗五升。月小。米四斗三升五合。俱自置盔甲什物。遇警調用。○七年題准。



天地壇巡捕官軍止於牆外巡邏。其壇內令本壇巡風員役巡看。不許容留外人。○十一年議准。通州張家灣一路。錦衣衛每季擇委的當謹慎官校。緝捕盜賊。姦細妖言。及機密重情。不許干預詞訟。囑託公事。及比較打卯。用強奪功。違者聽該地方撫按巡倉等官。指實參奏。拏問。若緝獲賊犯。即便拏送分守。或州衛官處。鞠審明白。解送該衛施行。○又題准。巡捕官軍五日換班。於宣武門外操演。有倒死馬匹者。先於太僕寺領馬。其該追椿頭銀兩。候年終追完。送太僕寺。○又

題准。巡捕官軍每二員名。共給兩帽。氈衫一副。上班披帶巡邏。下班交付接班之人。○十三年題准。令在京巡捕參將。將尖哨一百名。分作兩班。聽兵部差遣。爪探聲息。其餘盡數點齊。照巡捕所管地方。分為七路。每十里。設置塘馬二匹。軍一名。十日一替。具呈兵部。各路定委提調官二員稽察。每年六月初旬。分撥擺塘。待十月初旬。掣放。如有非時警報。兵部票傳擺設。不拘定期。○十五年奏准。於尖哨官軍內。定撥精銳四百員名。就委原管尖哨把總千戶。添委指揮一



員。分為兩班。在於城內武藝庫駐劄。不分寒暑。於阜城門外。首宿空地。輪日常川操練。遇警分調。○二十一年。添設巡捕官軍五千員名。○三十一年。題准。兵部劄委司官一員。監同巡捕叅將。在民兵教場內。操練巡捕官軍。○三十五年。題准。兵部劄委司官一員。督同巡捕叅將。在工部鐵廠。將巡捕官軍常川操練。○三十七年。題准。添提督巡捕叅將一員。革去原管主事。著兵科給事中一員查點。○四十二年。題准。以後巡捕營事務。不必另差給事中。兵部劄委司官一

員專理。其巡捕官軍倒損馬匹。併聽京營科道叅奏。○又題准。巡捕官軍馬匹。折支料草銀兩。把總官造冊。提督覈實。聽兵部管理。巡捕郎中查覈。徑赴巡視太倉科道掛號。往戶部關領。京營科道不必掛號。○又議令。巡捕軍士。照三大營事例。老弱不堪者。許令的親兒男弟姪。徑自送部。復驗收伍。摘牌更替。○四十三年。題准。巡捕營新抽操軍三千名。仍令督捕郎中。公同提督查出。與同別軍分為兩班。上班夜巡。下班操練。如仍前役。占聽郎中併科道叅究。但有地方



失盜該管把總即報兵部督捕郎中仍登記文簿以便稽考。如果失事數多將提督官一併參究。○萬曆元年題准巡捕營尖哨務足原數不許掣動。內有行糧尖哨一千二百名定為一等。黑夜巡邏白晝駐守無行糧尖哨一千八百名定為一等。照舊下夜凡有馬匹先儘尖哨不許走把軍士謀領其巡軍下夜與各衙門看庫等雜差俱要更換以均勞苦。如有戀差一年以上者即開除名糧。○三年題准太僕寺撥馬四百匹給巡捕官軍。巡捕軍缺叅將每月終呈職方司轉行各衛所掌印官許將本軍戶下兄弟子姪年力精壯者赴部告補如本戶無人以別戶丁多軍餘頂補通聽督捕郎中勘結明實發營當差。○又議准行令提督官定擬責任將該營四至會同隣境官司畫地分區設立界牌永為遵守。交界五里之外遇有盜賊生發仍協同策應擒捕不得坐視。○又令巡軍拏獲盜賊該營審取賊証真實兵部并京營科道覆審的確批發該城兵馬司備錄批詞將賊併賊送法司問理。巡軍聽其即回地方巡邏不必拘留待對。居



民被盜。當時喊叫。官軍不與緝拏者。方許具告。聽提督官比併把總嚴限緝拏。如過三日後告者不准。凡犯夜之人。聽巡軍拏送提督發落。○十二年題准。凡京城內外。遇有盜賊竊發。自卯至申。責成兵馬司。屬巡城御史參究。自酉至寅。責成巡捕營。屬巡視科道參究。但遇失事之時。立刻申報。不許遲延隱蔽。賊情重大。仍要協力捕剿。毋以晝夜推諉。應緝盜賊。查自何官捕獲。各論功敘錄。

在外

凡各府州縣巡捕。弘治五年題准。通州。涿州。德州。河間。分守守備官。及武清衛捕盜官。遇該朝覲會試之年。統領附近衛所京操下班馬軍。分班巡捕。○十六年奏准。四川各州縣添設判官主簿各一員。捕盜。○正德六年奏准。添設江西贛州。南安。瑞州。廣信。四府。福建汀。漳。二府。湖廣鄖陽。武昌。岳州。衡州。永州。五府。陝西漢中府。四川保寧。重慶。夔州。三府。及兩廣各府。捕盜通判各一員。○十二年。添設山東青州府。捕盜通判。○十四年。添設福建福州府。捕盜通判。○十五



年。議革湖廣衡州府捕盜通判。以撫民通判管  
理。○十六年。添設雲南大理府捕盜通判。○嘉  
靖三年。令河南彰德衛輝二府管馬通判。懷慶  
河南二府協管府事通判。各兼管巡捕。○十一  
年。添設真定府巡捕同知一員。○二十七年。添  
設福建南靖詔安二縣巡捕主簿各一員。○三  
十四年。題准。令浙江等處。南北直隸撫按等官。  
嚴行各該司府等官。遇有盜賊生發。一面設法  
緝捕。一面懸示賞格。除曾經殺人。放火。奸淫婦  
女。真正強賊。不貸外。其同上盜而未曾分贓。雖

分有微贓。而不曾同盜。與夫脇從。妄攀之人。俱  
免本罪。果能捕獲賊首送官者。仍加陞賞。○隆  
慶五年。題准。各巡撫都御史。嚴督各官守備。如  
遇地方盜賊生發。即便追剿擒捕。務期得獲。每  
年終。稽查各官下強賊起數。分別大夥零賊。有  
無殺人放火。并已獲未獲數目。定擬殿最。另各  
舉刺。○萬曆四年。題准。令各省撫按衙門。以後  
凡遇盜賊竊發。不論打劫官府。搶奪商民。事情  
大者。不時奏聞。次則近者照舊一月一報。遠者  
季終一報。歲終類報。俱要一面具奏。一面嚴督



官兵上緊緝拏。如有疎怠隱匿。聽兵部該科叅究。○又令兵備官以詰戎弭盜為職。今後但係該管地方失事。俱要一體論罰。

賞罰

廠衛緝捕附

凡巡捕。洪武二年令。凡常人捕獲強盜一名。竊盜二名。各賞銀二十兩。強盜五名以上。竊盜十名以上。各與一官。名數不及。折算賞銀。應捕人不在此限。○宣德元年令。擒獲強盜。賞鈔二千貫。為首官。旗軍校。陞一級。民匠人等。免差役一年。○二年令。凡軍官於所轄地方擒獲強盜。即

係應捕人員。不准陞賞。若不係該管地方。及公差在外擒獲者。指揮四名以上。千戶衛鎮撫三名以上。百戶所鎮撫二名以上。照例陞賞。旗校軍民匠役等。不限地方。○弘治元年令。巡捕官軍能擒白晝騎馬劫財強盜。照依沿邊殺賊事例。一名陞署一級。○又令。有能緝知強賊。報官拏獲。不分官員軍民舍餘人等。照例陞賞。同夥賊伴出首。免罪。還將賊犯家財量賞。○二年令。捕獲出境妖人。搆結夷人。謀為不軌者。為首陞二級。為從陞一級。應捕人役。若賊衆勢兇。登時



擒獲三名者為首陞一級。為從給賞。或被傷害子孫陞實授一級。世襲。若非應捕。能登時并三月以裏緝獲者。量陞一級。月久者給賞。凡因捕盜已陞者。後再有功。止照例給賞。違例乞陞保陞者。許科道劾治。

凡在京巡捕。成化二年令緝獲妖言。提督官陞一級。官校給賞。○十四年令緝捕妖言者。量行給賞。不陞。○十九年令官校捕盜官兵百名以上。提督官陞一級。○弘治十年令捕盜至四百名以上者。提督官陞一級。○嘉靖十一年議准。

今後不分應捕不應捕人員。果係兇惡強盜。聚至百人以上。有能臨陣擒斬。登時捉獲三名以上。為首者。准陞一級。其非應捕人員。果能三月以裏緝獲真犯三名者。為首量陞一級。不賞。為從。併不及數。與緝獲妖言賊人者。每名賞銀五兩。至十名而止。同獲均分。拏賊已陞。後有功。次止。照前給賞。每陞不過十名。給賞不拘名數。巡捕把總等官。仍照舊例給賞。若係平時緝捕強盜。數雖不多。曾經殺傷人。及拒捕。并劫財。每賊名下。分有贓物。估值銀三兩者。每名賞銀五兩。



賊多照前分數遞加至五十兩而止。其所得賊物不及者照前分數遞減至二兩而止。若係拏獲積年劇賊者不分賊物多寡仍賞銀十兩。買奪占為己功希求陞賞者不拘應捕與不應捕人員俱不准給賞。其地方失事各該應捕官員即要從實呈報兵部及提督官該城御史附記責限緝捕限外不獲該管地方委官把總該城兵馬錦衣衛西司房委官一次二次記過三次聽提督官并巡視御史參奏本部按簿查明奏請提問○又議准巡捕官軍人等但有拏獲強

盜先送提督官處審係賊仗明白方許送部轉送法司收問。若所獲本係竊盜妄作強盜意圖報功查發得出從重究治○三十七年題准每半年動支太僕寺馬價銀三百兩寄武庫司收貯遇有巡捕官軍捉獲盜賊量給充賞○隆慶元年題准京城內外失事巡捕把總等官聽京營科道會同兵部委官各坊兵馬指揮聽巡城御史各量失事輕重參究治罪嚴限挨拏左右參將照舊例若賊明火持仗一月內連劫三次以上者徑自參提其提督并正兵馬俱候年終聽



京營科道并巡城御史。分別功罪。各令獎舉。參治○萬曆元年題准。巡捕官軍陣前對敵。擒獲強盜一名者。為首賞銀三兩。為從賞銀二兩。緝獲一名。量賞其半。脅從者。每人賞紅布一疋。花一枝。陣亡。視對敵為首加倍。被獲。視緝獲為首者。各給恤。參將把總等官。比照廠衛緝獲強賊事例。類議陞賞○二年題准。京城內外地方。但有盜賊生發。城內三五名以上。城外十名以上。劫財傷人者。該管把總兵馬官員。即時擒獲者。准免究。仍與論功。比照廠衛事例。一體敘錄。若

有疎虞。先行住俸。拏獲一半以上。方准開支。二十名以上。全數脫逃者。住俸限三箇月。以裏。拏獲一半以上。姑免參治。過限不獲。罰俸三箇月。仍令戴罪拏賊。若三十名以上。不分擒拏在逃。參治革任○十一年議准。京城內外。但有強盜得財傷人者。巡捕把總兵馬等官。即時擒獲。免罪。仍論功敘錄。若有脫逃。俱即住俸。限三箇月。以裏。拏獲一半以上者。姑准開俸。過限不獲。各罰俸三箇月。仍總計一年之內。除盡數拏獲。及拏獲一半免罪者。不計外。城內積至五起。城外



十起以上。俱問罪。降一級。文官仍調外用。凡在外巡捕。成化二十一年。奏准。各處撫按等官。遇有報到賊情。即行都布按三司。分巡。分守。及掌印官。嚴督捕盜官兵人等緝捕。如有隱蔽賊情。不行開報。事發之日。應提問者。就便拏問。應參奏者。奏請拏問。內係一次。二次。不報者。住俸挨捕。三次。不報者。戴罪挨捕。至四次以上。不報者。不分軍民職官。俱監候。奏請降等敘用。○又奏准。各處盜賊生發。事干城池衙門。殺官。劫庫。劫獄。并積至百人以上者。限一月。以裏不獲。

聽鎮守。巡撫。巡按官。將分巡。分守。守備。及府州縣衛所。巡司。掌印。巡捕官。住俸。戴罪。挨拏。盡絕。照舊支俸管事。半年不獲者。俱聽巡按御史提問。三司掌印官。照依常例發落。其餘每一起。將州縣守禦千戶所。巡司。掌印。巡捕官。并專一地。方守備等項。及府衛巡捕官。降一級。每二起。府衛掌印官。降一級。每三起。分巡。分守官。降一級。俱調邊遠去處。○弘治十三年。奏准。凡在外官庫被盜銀至一千兩以上。一箇月不獲。經該衙門。并巡捕官。俱各住俸。半年不獲。提問。被盜二



會典卷百三十三  
三次者。奏請降調。其該道分巡分守官。參奏罰治。不及前數者。俱照常發落。庫子儘其財產。均追賠償。候真贓得獲。照數給還。若各官妄拏平人。逼認盜賊。追陪者。亦問罪降調。○十六年議准。通行山東。河南。江西。南北直隸等處。官兵人等。果有對敵就陣。擒斬有名劇賊一名。顆者。照依邊方事例。陞一級。世襲。其擒斬隨從強賊三名。顆。并陣亡者。亦陞一級。世襲。如不係對敵。止是緝捕三名者。陞一級。不准世襲。不及三名者。給賞。不係應捕人員。亦一體陞級。領軍把總等

官。部下擒斬有名劇賊五名。顆以上者。照依邊方事例。陞實授一級。部下擒斬從賊七十名。顆以上者。陞署一級。五百名。顆以上。陞實授二級。○嘉靖三十九年題准。各省布按二司。守巡。并兵備。府。州。縣等官。若縱容盜賊。不行擒捕。十名以上。州縣掌印巡捕官。住俸戴罪。五十名以上。降俸一級。立功自贖。百名以上。并將守巡兵備官。參奏處治。今後所屬地方。果有強盜聚至十人以上。克惡顯著。曾經對敵。當陣生擒二名。及斬首二顆者。准陞一級。不願陞者。賞銀三十兩。



若不係臨陣。止係緝捕者。每名顆賞銀十兩。拏獲竊盜一名者。賞銀五兩。夥內能自相擒斬者。免其本罪。仍一體陞賞。經管官員酌量敘錄。應賞銀兩。先儘贖銀。不敷之數。於無礙銀兩動支。○四十一年題准。凡沿邊沿海及腹裏府州縣與衛所同住一城者。及衛所自住一城者。若遇大虜及盜賊生發。攻圍不能固守。或棄城逃走。或開門延賊。致賊進入。殺虜男婦三十人以上。燒毀官民房屋者。衛所掌印官與專一捕盜官俱比照守邊將帥失陷城寨者律斬。其府州縣

掌印官及捕盜官與衛所同住一城者。不能竭力協守。俱起送吏部降一級別用。其餘府州縣不分各邊腹裏。原無設有衛所。但有專城之責者。若有前項失事。掌印捕盜官俱比照牧民官激變良民。因而失陷城池律斬。其自來不曾建立城池。與雖設有城池。被盜潛踪隱跡。設計越城。進入劫盜。事出不測。雖有前項失事。俱不得比用此律。守巡兵備止於參究治罪。量事情輕重。臨時奏請定奪。○隆慶六年題准。捕盜條格。各州縣掌印巡捕官。有盜至十名者。降一級。二



十名者降二級。三十名者罷其官。各兵備及該道官所屬有盜合至五十名者降一級。七十名者降二級。百名以上者罷其官。撫按官有隱匿不行參奏者。聽兵部都察院及科道參奏重治。若果地方有盜。即行申報上司。就便捕滅。上司官若聞地方有盜。即撥兵馬。就便捕滅者。免究。仍錄敘其捕盜之功。量多寡為陞賞。○萬曆元年。令以後各該巡捕兵備官。遇有強賊生發。雖不係本管地方。有能協力捕獲者。該部紀錄擢用。賊情重者。仍行給賞。該管地方官。加等治罪。

○二年議准。州縣但係無有城池去處。倉庫被他境賊盜潛來打劫。不論賊名多寡。掌印巡捕官。俱住俸戴罪緝捕。過限不獲。從撫按衙門提問。降一級。調邊遠用。兵備及守巡。駐劄該道。俱照不及降用。有城池州縣。倉庫。獄囚。被劫。掌印巡捕官。俱問罪。降二級。調邊遠用。兵備及守巡。駐劄該道。俱降一級。調用。州縣與衛所及守備官。同城。其守備及衛所掌印。操捕官。與有司一體問罪。降級。若衛所倉庫被劫。專以衛所掌印操捕官問罪。降級。係本處嘯聚之盜所劫。自守



巡兵備與軍衛有司。俱加一等。隱匿不報者。加二等。○又議准。但強盜劫掠倉庫獄囚。重大事情。不分有無殺人。俱各先行具奏。限三箇月以裏捕獲。如竊盜盜庫。及監收人等侵盜庫銀。止照律例問罪。不必具奏。其本處嘯聚之賊。必須著有姓名。不能訪拏。既行劫掠。仍聚不散。及拏獲之日。果係本管賊人數多。方坐前罪。○六年議准。城外民家被盜。各該府州縣衛所掌印巡捕官。及守備守巡等官。俱照成化二十一年例。分別起數降調。城內各加一等。如果強盜於禁

城殺人。方行參奏。○又議准。盜賊行劫。有司軍衛員役登時具報。以失盜之日為始。過三日不報者。以隱匿論。府州縣掌印官。及撫按司道。以各申文到日為始。每一日以一百里為限。計程違三日之外。以隱匿論。○十一年議准。府州縣係有城池。及設有衛所。被賊打劫倉庫獄囚。或殺死職官。或聚至百人以上者。撫按官就將各掌印操捕等官。先行參奏住俸。戴罪緝捕。限半年以裏盡數拏獲。免罪。如過限拏獲未盡。再限三箇月盡獲。亦准免罪。若全無拏獲。及再限內



不能盡數拏獲者。不分軍衛有司。俱問罪降二級。文官送部。武官仍於本衛所各調用。衛所失事。止坐衛所掌印操捕等官。兵備守巡。并守備官。駐劄本城者。降一級調用。不係駐劄處所。止調用。若自來不曾設有城池者。掌印巡捕等官。止降一級。兵備守巡守備等官。分別罰治。沿邊沿海。及腹裏府州縣。與衛所同住一城。及衛所自住一城者。若遇大虜。及盜賊生發。攻圍不行。固守。而輒棄去。及守備不設。被賊攻陷城池。劫殺焚燒者。衛所掌印。與捕盜官。俱比照守邊將。

帥失陷城池者。律斬。府州縣掌印。并捕盜官。與衛所同住一城。及設有守備。駐劄本城者。俱比照守邊將。帥被賊入境內。擄掠人民。律發邊遠充軍。其兵備守巡官。駐劄本城者。罷職為民。若非駐劄處所。兵備守巡。及守備官。俱降三級調用。若府州縣原無設有衛所。但有專城之責者。不分邊腹。遇前項失事。掌印捕盜官。照前比律處斬。兵備守巡官。亦照前罷職降調。其有兩縣同住一城。及府州縣佐貳首領。但分有守城信地。各以賊從所管城分進入坐罪。若無城池。



與雖有城池。被賊潛踪隱跡。設計越城。進入劫盜。隨即逃散。不係失陷者。止以失盜論。俱不得引用此例。各處民間被賊打劫。即時擒獲者。不分城內城外。各掌印巡捕等官。俱免罪。一月之外。不獲通行住俸。候拏獲一半以上。方准開支。若中間能獲別起。及別府州縣真正強盜。及各越獄重囚。亦准抵數。但不許將照捕名數。朦朧捉拏。以圖抵飾。仍通計一年之內。除盡數拏獲。及拏獲一半以上。免罪者。不計外。城內積至五起。城外及無城去處。至十起以上。不分軍衛有

司。掌印巡捕等官。參究問罪。俱降一級。文官送部。武官於本衛所。各調用。兵備守巡官。分別罰治。凡強盜打劫。各該有司軍衛員役。不分事情輕重。務要登時從實申報。如有隱匿者。撫按官即將各該員役。應提問者。提問。應參奏者。就便參奏。酌量情罪。議擬上請。不許容隱。其撫按官遇有報到。若係殺官。劫庫。劫獄。并聚至百人以上。或嘯聚不散。及城內打劫。至殺人者。即行奏報。其民間被劫。事情稍輕者。類入歲報冊內。年終具奏。俱不許容隱。違者聽部院該科參奏重



治○又題准各處民間被盜打劫即時擒獲者不分城內城外各掌印巡捕等官俱免罪。一月之外不獲通行住俸。候拏獲一半以上。方准開支。城內積至五起。城外及無城去處。至十起以上。不分軍衛有司掌印巡捕等官。叅究問罪。俱降一級。文官送部。武官於本衛所。各調用。凡強盜打劫。有司軍衛。俱要登時從實申報。隱匿者聽撫按官叅擬降罰。○又令各軍屯與有司交錯去處。照坐落地。方屬兵備官管轄。遇重大賊情。併力逐捕。如有失事。該巡捕軍官。亦聽兵備

叅呈撫按衙門提究。各省直但有軍屯者。俱照此例。

凡東廠錦衣衛緝捕。嘉靖二十七年題准。行令廠衛。每年終將各項獲功職役姓名。勞績緣由。首從的數。備造文冊。用印鈐蓋。開送兵部。附簿登記。候至三年。類奏下部查對相同。仍行法司覈實。應陞應賞。遵照格例議擬覆奏。其提督官酌量陞賞。取自

上裁。間有奇功異績。優錄出一時。特恩者。毋輒援引陳乞。該衛鎮撫司。鞠問各項罪犯。



事完具奏。止開獲功人員的確首從名數。用備查考。毋輒議及陞賞。○又例。廠衛訪獲私造偽印。硃符。路引。鎮撫司問明。止照例給賞。不許乞陞。○四十二年題准。廠衛緝訪。止屬風聞。待法司成獄。方許紀功。每當類奏。該部同廠衛會題仍

勅兵刑二部勘對明白。請

旨陞賞。○隆慶元年題准。如有緝獲真正奸細。及妖言者。不許私自訊考。徑送刑部。多方審究。果有的據。備取招由奏請。係奸細者。照例陞級。係妖言者。事大量陞。事小量賞。其餘子殺父母之類。自有親族具告。法司受理。旗校人等。不許羅織無辜。希圖陞賞。



大明會典卷之一百三十六

大明會典卷之一百三十七

兵部二十

**軍役**

按軍政條例甚多。凡內外勾解到部。其定衛斷發及遇缺投充收補。與重冒存恤等項。屬職方司。其根捕勾補及清理挨查。改編等項。屬武庫司。若職方司有首補者。即行武庫司住勾。其司府用內。有問發而無解到者。行武庫司會單查勾。二司雖各有所掌。亦互相稽核云。

凡衛所額軍。洪武二十六年定。內外衛所軍士。俱有定數。大率以五千六百名為一衛。一千一



百二十名為一千戶所。一百一十二名為一百戶所。其有衛分軍士數多。千百戶所統則一。每一百戶所。設總旗二名。小旗一十名。管領鈐束。大小相維。以成隊伍。管軍官員操練撫綏。務在得宜。毋致紊亂。空歇。

**收補**

凡收補軍士。洪武二十六年定。凡遇各布政司。并直隸府州縣。勾解內外衛所逃故軍人正身。并戶丁到部。審實明白。逃軍照例斷發。有能自首者。免罪復役。其補役戶丁。如在京衛分。填給

勘合。差人送發該衛交割。在外衛所。送赴該府。通類差人押送。取收管回照。仍行移各衛收役。年老殘疾。發回兌換壯丁。其幼小戶下無丁者。年十三四以上。送衛操練。七八歲以下。或發在營。或發原籍依親。行移該衛紀錄。候長成勾補。其有奸頑。故推老疾。不將壯丁補役者。問罪如律。仍勾壯丁。若長解不行。用心管解。以致脫逃。依律責限。發回根捕。受贓脫放。送法司問罪。其有民人首報投軍。并遠年歇役軍丁。首報著役。無衛分者。照發外衛。有原衛者。就發充軍。仍行



原籍官司體勘若有規避。提送法司問罪。○又令內外衛所軍人。或有死亡戶絕。或有陞調。或為事起發等項。缺下隊伍。須要行移衛所保勘明白。許令除豁。即於多餘軍內撥補。若死亡止有幼丁。許令本衛紀錄在伍作數。其在逃未獲。務要根勾正身。俱各不許撥補。○成化十三年題准。各處衛所軍人。陞職調衛等項。遺下弟姪義男女婿。及迷失鄉貫人等。有情願於附近衛所投軍者。保勘無礙。准令著役。○十九年。令各處清出迷失衛所軍人。及投充軍士到部。照例編發缺軍衛分。法司問擬充軍犯人。定衛送該府押解。守哨犯人。送府押遞。各處總兵官定撥。○又令各處解到軍士。每年輪委主事一員。驗其年力精壯者。送操聽調。其餘分撥雜差。○弘治三年。議准。置立收軍文簿。每都司一扇。每衛所各一扇。自弘治元年為始。將發到來歷日期。備細開寫。每年終將收過軍數。造冊送部。在外問刑衙門問過軍犯。俱要抄招送部編發。若未經撫按等官詳允。照例行移刑部詳議。方與定衛。以後遇赦。該都司衛所。務將各軍應否釋放。



緣由申部待報釋放○九年題准。凡解到軍士。除附近兩京衛所。照舊解部轉發查理外。其餘衛所。置與印信文簿一扇。專委軍政掌印官。遇有解到。即時填寫本軍并妻姓名。投批批迴。月日。差操處所。候分巡守備巡按等官。按臨弔查。若有情弊。聽各官參究發落○十三年。奏定收軍事例。除順天府所屬人民。并騰驤左等四衛。牧馬所軍餘。及各處逃移不知下落之人。并正軍正匠外。其餘在京。不分官員軍民。匠役校尉之家。舍人。餘丁。願投軍役者。造送兵部勘明。收

充軍役。編入府軍前衛各所食糧。俱送團營操練。止充一輩。願當者聽○正德四年。令各該衛所空閒餘丁。情願投軍者。准收充補伍。不許抑勒。并將有司民籍。別衛軍丁。外方流寓之人。收補。致生奸弊○十年議准。凡祖父原充遠軍。子孫投附近衛所。冒頂異姓名伍作弊者。許自首。官旗免罪。軍發原衛著役。若不首事。發調極邊衛。其官旗參問賊罪。奏請調衛差操○嘉靖元年。奏准。在京七十二衛。俱照騰驤四衛事例。每五年一次。攢造編軍文冊。每衛一樣三本。一本



送兵部。一本送戶部。一本留該衛存照。○三年  
奏准。各衛所官軍舍人餘丁。三丁以上。及京城  
在外原無身後壯丁。准抽選招收二萬四千名  
以實營伍。止終本身。○十六年議准。各該軍衛  
有司衙門。凡官下舍餘軍下餘丁。如果戶族衆  
多。不係應襲聽繼之人。或民間空丁。寄籍空戶  
不係逃犯聽解軍戶人數內。有情願投充軍伍  
者。給撥空閒屯田佃種。責令辦納子粒。務使軍  
屯領種適均。不致冒濫。事完之日。造冊奏繳。○  
三十年題准。每年終。布政司類造本省問發軍

犯文冊。都司類造解到軍犯文冊。其永遠者。備  
開戶丁事產。直隸府州。照各布政司。直隸衛所  
照各都司。一體類奏。申呈撫按。類造二項奏冊  
各一本。奏繳。青冊各一本。送部查考。兵部專委  
主事一員。逐一查對。如司府冊內有問發。而司  
衛冊上無解到者。就行武庫司。會單發冊查勾。  
各作弊軍犯。及官吏人等。撫按依律究治。候造  
黃冊之年。各司府州縣。備查所屬充發永遠軍  
犯。開行該管州縣。將本犯本房人丁事產。分出  
另立軍戶。係匠竈軍籍者。于本戶冊內。備細開



註。日後事故。俱于本戶本房丁內勾取。敢有止將正軍人丁。捏作旁枝。開作民戶者。事發。官吏俱問枉法。

### 重役

凡重役。洪武二十三年。令天下衛所。有一戶充軍二名者。免一名為民。○二十六年定。有陳告一戶。或為梁集。首報收集。或為事問發。在京在外衛所。重役充軍二名三名者。須行各衛著落。當該官吏。保勘明白。及揭照黃冊。果係同戶。別無人丁。具奏定奪。其有為事免罪充軍正身。并

丁多者。不准。如有隱瞞丁口。朦朧陳告者。問罪如律。○洪熙元年。令軍戶重役者。不問二處三處。止併一處。其餘悉與開豁。○宣德四年。令軍戶重役。止有幼丁二人者。出幼之日。以一丁補正役。一丁補軍餘。餘衛皆免。若調發別衛。而本衛又勾戶丁補役者。勘實發回。聽補見役衛分軍伍。其召募等項。見丁充軍事故。照名勾補者。先解一名。次具實有人丁申報。擬奏定奪。○隆慶六年

詔軍戶有重役。不問三處五處。遇有事故。如果戶



內人丁消耗。只併一處勾丁補役。其餘悉行開豁。毋得展轉勾攝。剝削無辜。亦不許指此為由。狗私賣放。空歇軍伍。違者各治以罪。○又令凡各司府州縣。除逃故祖軍的派戶丁。照例清解外。其餘勾單重隸者。止從改調衛所。其重役者。毋得妄解。佃戶。女戶。同姓名而異籍者。悉聽開豁。候各巡按清軍御史差滿。造冊送部。如軍衛有司官不遵條約。朦朧占愴。或夤緣枉縱者。御史叅究。

### 冒名

凡冒名。洪武二十六年。定有陳告本戶。係是民籍。止與故軍同名同姓。被里甲人等賣放。正軍朦朧冒解者。發回合干。有司提對。曾經府縣呈告不理。著令所管上司衙門歸問。若俱不理。必須給批差人。先提當該吏典。并事內干問人數。送法司對問。其有干問府縣官員具奏取問。若被在衛軍人供指。就便送法司對問。果係故軍生前妄報。坐名勾取者。揭照黃冊。是實改正。發回為民。仍行原衛。著落親管官旗。挨勾應補正軍。○宣德四年。令民戶與軍姓名相同。冒勾解



者照例審實開豁。若同姓同名之人已經到衛食糧三年之上者不准。○十年令有妄指同姓同名為軍者雖有該部文移坐取有司即與保明不許朦朧冒解。○正統二年令軍丁訴告冒解者暫收著役行移照勘果係冒解改正為民。妄告者行本衛究治。○隆慶六年

詔軍戶有丁倒戶絕并同名同姓被人妄報連年勾擾者有司從公體勘得實即轉達該府兵部開豁

### 老疾

凡老疾軍人。洪武十五年令各衛軍士年老及殘疾有丁男者許替役。所管官旗留難者坐罪。

○二十三年令老疾軍有子年一歲二歲該紀錄者皆與正糧候成丁收役不許別勾以亂隊伍。○二十六年定凡內外衛所軍人或征進工作傷殘或患痼疾及年老不堪征操者須要保勘相驗是實許令戶下壯丁代役。若無少壯止有幼小人丁許令該衛紀錄操練仍令老疾隨營。如果戶絕無人揭籍查勘明白具奏除豁聽令隨營或依親還鄉缺下軍伍於多餘軍內撥



補○宣德四年令故軍戶下止有人丁年七十以上或篤疾殘廢不堪充軍者保勘是實明白回報定奪不必起送官吏人等不許因而作弊將不係老疾之人朦朧妄報脫免軍役違者論罪○成化十七年奏准幼軍有老疾者相視明白具奏疏放開伍但逃者仍勾其戶丁補役其補役者亦終本身○弘治九年題准在京各衛所老疾軍人力士奏放回者除府軍前衛旗手衛查勘明白照例另行其餘衛所軍匠奏告兵部仍送本衛所查果年六十以上著令營丁告

部行勘替役若營無人丁發冊原籍清勾解補食糧應役之後方許替回其正軍病故許令隨營子孫補役若未出幼紀錄在官候出幼之日差操食糧經該官吏若將前項情節朦朧作弊事發照依律例從重叅究○十八年奏准府軍前衛幼軍審係原逃年五十歲以下無疾者方解本身若年五十以上及老疾病故者俱於各軍名下勾取親男解補若無親男解戶內壯丁補伍到衛應當十年之上不曾脫逃者老疾或病故之日查勘是實即與開豁不許勾丁如或



到衛脫逃。或當軍不及十年之上者。仍取戶丁。再當一輩。仍要終身不逃。年老方許開豁。該衛所官吏。若有一向在伍。老疾應放之人。不行分豁。及違例妄收年老正身。并逼令壯丁在逃。或將不該免之人。朦朧疏放。其有司官吏。或妄將五十以上老疾之人。起解搪塞。通行參究。仍三年一次。查勘無礙。驗實疏放。○正德十五年。奏准。幼軍在伍。十年不逃。并繼補戶丁。雖逃一次。重解復役。應當十年者。老疾。照例除豁。○嘉靖四年。題准。幼軍老疾。或年滿於民間。另僉。如將已當過者。一槩與逃軍發冊清勾。擾累先當人戶。照例問罪。○三十年。議准。各該巡按清軍御史。遇有原係府軍前衛。僉取侍衛。幼軍逃故。曾當一二輩。年久者。審實。取具供結。給免。事完造冊。奏繳。仍照式造青冊二本。一本送部查照。一本行衛除名。以後再不許勾解。三十年以後。見役不逃者。年久病故。照例開豁。其老疾無用。照例三年一次。奏查踈放。俱免勾補。如有逃回。係從來未及一輩者。亦不必勾丁解衛。務須根捉原軍著役。老疾故絕。亦免勾丁補伍。果係軍匠。



重役之家亦聽免解。其自願應當者俱照例行。不許幫貼。在逃一體根捉。與老疾故絕者俱免。勾解戶丁。凡有故違俱各叅提。從重究治。

**存恤**

凡存恤。宣德元年。令新勾到衛軍士。限半月收幫月糧。兩月葺理房屋。俟其安定方許差操。○四年。令天下衛所。每軍一名。免原籍戶下一丁。差役。在營軍餘亦免一丁。令專一供給。○又令新勾軍士。照例收糧一箇月。經理居住。方許差操。若軍吏總小旗人等。違例虐害。在內監察御

史。在外巡按御史。按察司官。及鎮守官員。巡察拏問。軍官具奏定奪。其原降榜文。都司衛所置立板榜。各於公廳懸掛。永為遵守。○正統二年。令科道兵部主事各一員。督同五城兵馬。巡點存恤。有限內差撥。及私役科擾者。叅奏問罪。其各衛仍委官一員專管。○又令各省解到新軍。送存之日。給票月支米一石。三箇月滿日。該衛送驗軍主事處。驗發營操守衛各項差使。如有存恤後在逃者。復解不准存恤。徑驗差使。○三年。令新軍逃亡過二百人者。該衛存恤官罰俸



五箇月。過百人者。三箇月。不及百人者。兩箇月。在外衛所。依在京例。仍從巡按按察司官點視。○成化十二年題准。凡在京存恤等官。及在外清軍御史。督同委官。每年十月終。查有官旗不行。鈐束撫恤軍士。致令在逃者。量其多寡。扣算。參究拏問。若軍人畏懼差操。自行逃躲者。並以軍政條例問究。○弘治五年。令清軍管屯官。將原係衛所營房屯地。見在住種空閒等項。逐一查明。造冊在官。候解到新軍。及見軍無棲止。即將空餘屋地。量撥住種。官豪侵占者。行令改正。

免罪。若軍人自置民間地土。不在此例。○七年題准。各守巡兵備官。凡遇出巡。將所在衛所解到軍士。逐一查審。要見某軍。何年月日解到。曾否存恤。見在某處差操。某軍在逃。有無剝削賣放情弊。查過。按季開報。合干撫按查考。○十一年題准。凡官旗將存恤新軍。收糧未滿三月。輒便撥與重差者。問擬違制罪名。其巧立名色。勒財。贓未滿貫。及逼令逃竄五名以上者。京衛調外衛。外衛調邊衛。分各帶俸差操。遇革不宥。其各衛所掌印官。斟酌輕重。參奏治罪。○十三年



奏准。內外都司衛所求索新軍財物。因而逼勒在逃者。指揮十名以上。千戶鎮撫六名以上。百戶四名以上。各問罪降一級。每十名。六名。四名。各照數遞降。若不及數。及不曾得財者。照常發落。其存恤滿日。若受財賣放。賊至滿貫者。立功滿日。京衛調外衛。外衛調邊衛。邊衛調極邊衛。差操。不許管軍管事。○正德六年題准。軍丁各照例優免一丁。在營有餘丁。亦免一丁差使。其在三千里外衛所當軍者。原籍本營。亦准各免二丁。專一供給軍裝。軍衛有司。敢有仍前科擾

者。被害軍丁。徑赴清軍御史。并巡按御史處告理查究。問以贓罪。○八年題准。凡各清軍御史。將解到新軍。不拘遠近。務照例幫支月糧。不許差撥科擾。必待三箇月食糧滿日。方許揀選。不許官旗人等。科擾逼迫在逃。違者。叅奏拏問。照例降級。○十年。令遇有解到民間。僉補例不勾丁力士校尉。務要嚴督該管官旗。用心存恤。中間若有病故。而無人告給明文者。從實開報本衛。發用原籍。另僉點相應之人解替。若有求索財物。逼迫逃回者。事發定行究治。其本身在衛



老疾與解到逃回病故老疾不堪解補及起解不到者悉照舊例施行○嘉靖三十年令各都司衛所遇有解到新軍若指稱使用等項名色科索凌辱一年之內逼累在逃者照依賣放軍人納包月錢事例不問指揮千百戶鎮撫但五名以下問罪降一級六名以上降二級十名以上降三級甚者罷職發邊衛充軍○隆慶六年題准凡將官不善撫恤致有逃亡二分以下者附過三分以下者降一級五分以下者降二級年終兵備報督撫會奏○萬曆八年題准將旗

手等衛蕃牧等所專設存恤指揮千百戶俱革其一應事宜行令該衛僉書兼管每年終科道官一體舉劾如遇考選填註考語以憑黜陟

### 僉充民壯

機兵附

軍籍之外有民壯有司僉點以備警急即古民兵之遺意今附于軍役之後

洪武初立民兵萬戶府簡民間武勇之人編成隊伍以時操練有事用以征戰事平復還為民有功者一體陞賞○正統十四年令各處召募民壯就令本地官司率領操練遇警調用事定



仍復為民。○天順元年。令召募民壯。鞍馬器械。悉從官給。本戶有糧。與免五石。仍免戶下二丁。以資供給。如有事故。不許勾丁。○弘治二年。令選取民壯。須年二十以上。五十以下。精壯之人。州縣七八百里者。每里僉二名。五百里者。每里三名。三百里者。每里四名。一百里以上者。每里五名。春夏秋。每月操二次。至冬操三歇三。遇警調集。官給行糧。其餘照天順元年例。○六年。令官司私役民壯者。照依私役軍例問罪。○十一年。題准。每十年通行查審民壯一次。中間但有

年老殘疾。病故。人丁消乏。悉與僉換。若本戶見有壯丁十名以上。家道殷實者。仍於本戶內。僉取壯丁。更替一輩。事故不許僉補。操守城池之外。不許別占。敢有仍前作弊。照例降參。○嘉靖元年。題准。江南機兵。各照里分多寡量其丁產。審僉應役。較習武藝。每一州縣。多不過一二百名。農忙之時。非有緊急。聽其務農。不許雇覓遊手代當。官府亦不得差遣勾攝迎送。○六年。令各處撫按官。通行各府州縣。查照民壯原設之數量。為減革。其存留者。分為上下兩班。一班務



農一班操練武藝。委佐貳官一員管領。若有重大賊情。方許通調。候事寧仍舊輪班。違者罪之。  
○八年。令民壯人戶消乏者。聽各該巡撫官計處酌量存減。見在民壯。務要僉選精壯人役。冬月農隙。如法操練。止許各守地方。不許司府調集團操。其餘免操。月分不許稽留在官。以妨民事。官司敢有擅差勾攝及學習吹鼓迎接上司等項。俱從重究治。

大明會典卷之一百三十七



